

REGIONAL NEWS BULLETIN

HEADLINES (MORNING)

- 1. CYLA chuan Lawngtlai leh Siaha district kaltlanga Myanmar Rakhine State-a tuialhthei leh bungraw tawlh luh thin chu Inrinni zanlai atang khan an khap.
- 2. Myanmar atangin Mizoramah raltlan an luh belh zel a, tun dinhmunah Myanmar atanga raltlan awm zat chu 35,624 an tling tawh.
- 3. Sawrkar laipui chuan Telecom Service Providr (TOS) te chu rampawn atanga inbumna kaihnawiha inbiakna zawng zawng lo dang turin a hriattir.
- 4. Papua New Guinea-a leimin avanga thi zat chu mi 670 an tling tawh

<><><>

BAN ON TRANSPORTATION

Central Young Lai Association (CYLA) chuan Lawngtlai leh Siaha district kaltlanga Myanmar Rakhine State-a tuialhthei leh bungraw tawhlhuh thin chu Inrinni zanlai atang khan an khap.

Central YLA thuchhuahin a tarlan danin March thla laihawl vel atang khan Lawngtlai leh Lawngtlai District kaltlangin Myanmar ram Rakhine-ah eitur leh tui alh thei thahnem tak tawlh luh thin a ni a. Myanmar ram chu rambuai a nih avang leh Myanmar sipaite’n thlawhtheihna hmanga Rakhine chhunga beihpui an thlak thin avang te leh Arakan Army hel pawl nena ramri a inbeihna a thlen fo avangin mipui tawrhna leh vanduai palh theihna a tam a. Hetiang a nih avang hian he thuchhuah hi siam ta an nih thu an tarlang a. Tuialhthei leh eitur thawn luh kawnga inhnawnawihthe chu tawpsan tura an ngen thu an thuchhuah siamah hian an tarlang bawk.

Lawngtlai-a Akashvani Correspondent Lalngheta Ralte sawi danin Rakhine State ah hian tuialhthei leh eitur mamawhna a san em vangin a bikin Siaha leh Lawngtlai District a sumdawngte’n Lungpuk Siaha District kaltlangin an thawnlut nasa a. Bungraw phurh tur a awm tam lai phei chuan a bikin Lawngtlai district tualchhungah mamawh thila hman tur motor pawh awm mumal loh chang a awm thin a. Tuialhthei a van phah chang a awm bawk thin a ni.



HEROIN HAUL

Aizawl SP pisa a District Special Branch (DSB) a thawkte chuan Inrinni khan Selesih a NEC Junction hmunah heroin kg. 3 leh gram 457 an man.

Hei hi Mizorama tum khata heroin man tam ber pawl a tling pha a, Police thuchhuah chuan an heroin man hi cheng vaibelchhe 1 leh nuai 6 hu niin an sawi. DSB hnathawkte hian an thudawn bawhzui-in Aizawl a an pisa atangin Selesih hi an pan a. C.T. Liana, kum 25, Tahan khawpui, Myanmar a cheng ni a inchhal scooter khalh atangin sahbawn bawm 311 chhunga thuhruk heroin hi an man ta a. Heroin tawlhtu leh neitu a puh C.T. Liana lakah hian Bawngkawn Police Station-ah Narcotic Drugs and Psychotropic Substance Act, 1985 hmangin thubuui siamsak a ni a. Ruihlo lokalna leh hralh a tum dan bakah midang inhnamhnawih an awm leh awm loh chhui chian a la ngaih avangin Court phalna-in darkar 72 chhung Police-in an la kawl rih dawn a ni.



REFUGEES

Myanmar atangin Mizoramah raltlan an lo luh belh zel a, tunah hian Mizoram pumah Myanmar atanga raltlan awm zat chu 35,624 an tling tawh.

Zirtawpni khan zing atanga zan thlengin Champhai district-a Zokhawthar khua-ah raltlan 24 an lut tih Zokhawthar Village Level Committee on Myanmar Refugees hotute chuan an sawi a. Zokhawthar a lutte hi Myanmar rama Khampat, Phulmawi, Tahan, Tuivar leh Hmunlai khua atanga lo lutte an ni a. Zirtawpni zan vek hian Myanmar rama Tuimang leh Tuimui khua atangin raltlan 4 chu Saitual district-a Kawlbem khua-ah an rawn lut bawk a, anni hian he khua a an chhungkhat lainate an bel a ni. Inrinni khan Zokhawthar khua-ah raltlan 27 an lo luh belh leh bawk. Raltlan lo lut tam ber hi Chin state hmar lam Tonzang, Cikha leh a chhehvel khua amite an ni a. Tonzang leh a chheh vel hnaiha Myanmar sipai camp-te chu Chin National Army (CNA) leh a tanrualpui ‘mipui sipai’ invuah pawl hrang hrang 14 tangrualin an laksak tawh a. Sipai tlan darh an umzui laiin Myanmar indo thlawhnate’n kar kal ta Nilaini zan thleng khan helai vel hi a la bomb zui reng ni a thudawn a ni.

Hetih lai hian Tedim leh Tonzang township chhak lam Tahan leh a bul hnai khua atangin raltlan an awm ve reng bawk a. Myanmar sipai-in sipai a tan luihtir an tum avanga leh chhan dang dang avanga rawn tlanchhia an ni a. Chhim lamah pawh Maraland Defence Force (MDF) leh Chinland Defence Force (CDF-Mara) te inkara innghirnghona boruak a san vanga rawn tlanchhia mi 198 an awm bawk a. Anniho hi Siaha district a Laki, Lomasu leh Lopu khua-ah te an inbengbel mek a ni. Chin state chhim lam Paletwa khua leh a chhehvelah pawh Khumi hnamte chu Arakan Army hian an tihduhdah leh an pawla tan luihtir tumna avangin an sahimna zawngin an rawn raltlan bawk a ni. Khumi hi Mizo hnahtlak an ni a, mi 22 rawn tlanchhiate hi Lunglei district-a Khawmawi khua-ah an awm mek a ni.



POLICE CLARIFICATION

Police department chuan Bairabi leh Sairang inkar rel kawng siamna a bungraw bo ni a sawi chungchanga hma la tha tawk lo anga Police-te puhna chu thu belhchian dawl lo a ni, an ti.

Police department hian thuchhuah siamin tun hnai a Northeast Frontier Railways thuneitute'n Chief Minister an hmuh denchhen a Railways bungraw bo leh thubuaiah te Police ten hma an la tawklo anga ngaih theih tura thu thehdarh lo awm hi thu belhchian dawlllo niin, rel kawng siam mekah hian pawikhawihna a thlenin Police ten theihtawpin chhuichhuah hna an thawk thin a, thubuai tamzawkah bungraw rukbo te pawh hmuh let leh a ni, an ti. Home Department atanga hriattirna an dawn angin relkawng siam hna thawh meka harsatna leh thubuai lut awmah te hian Mizoram Police chuan theihtawpin hma a la thin a, Sairang Police Station, Kawnpui Police Station leh Bairabi Police Station-ah te hian rel kawng siam kaihhnawihah thubuai 28 ziahluh tawh niin thubuai hmasa ber hi Dt. March ni 22, 2018 ah Kawnpui Police Station-ah ziahluh a ni a, thubuai thar ber hi Bairabi PS ah kumin March ni 9 khan ziahluh a ni bawk a, he'ng zinga thubuai 26 chu rukruk kaihhnawih a ni a, thubuai dang 2 hi invau leh insuam thubuai a ni, an ti bawk.

Bungraw bote hi rel kawng siam hnathawktute inkulhna hmun bul hnai leh hmanraw dah khawmna hmun atanga bo ani tlangpui a, rel kawng atanga bo a awm lo a tih theih a, chuvangin hnathawktute hriat lohva ruk bo chu a harsa tlangpui ang, an thuchhuah chuan a ti a. Rel kawng siamna hmanraw bote hi bungraw rit tak tak - steel shuttering, heavy duty MS pipe, drain slab, bridge steel gate, steel plate, copper cable, channel leh hook bolt te telin mi pakhat tana ruk mai theih a nih loh bakah motor-a phurh sawn ngaite an ni, an ti a. Thubuai ziah luh kaihhnawihah hian thil sual titu mi 62 man tawh an ni a. Pawikhawihtu man zingah hian hnam dang 14 telin thubuai thenkhatah phei chuan a hnathawktute pawh pawikhawihtu an ni tih hriatchhuah a ni a. Thubuai ziah luh 28 atang hian thubuai 19 a bungraw rukbo te hi Police te'n an hmu let leh a ni, an ti bawk.

Thilsualtitute chhui chhuak tur leh thil rukbote hmuh let leh tur hian Police te'n theihtawp an chhuah thin ni-in an sawi a. Thil bona hmunte uluk taka endik in rel kawng siam hna thawktute bakah a bul hnaia awmte uluk taka kawm thin an nih bakah thirchhe leikhawmtute dawr zawng chhuakin rukruk thil ni ngeia rinhlelh zuar an awm leh awm lohte uluk taka zawhfiah thin an ni, an thuchhuak chuan a ti a. Hei bakah hian pawikhawihna te a thlen nawn loh na'n leh rel kawng siamna bungruate a bo lohna turin Police te'n theih ang angin an vilpui a, rel kawng siamna hmunte tlawhin patrolling neih thin a ni bawk a. Rel kawng siamna hmuna thawktute leh an hotute pawh be pawh an be pawh thin a, harsatna an neih chuan Police Station - ah hriattir vat tura hrih hriat thin an ni tih an thuchhuah chuan a tarlang a ni.

<><><>

ASF RESURGENCE

Inrinni khan Mizoramah African Swine Fever (ASF) vawk pulhri leng avangin vawk 12 a thi a, vawk 10 suat a ni bawk.

Heti hian Mizorama ASF vawk pulhri avanga kumina thi zat chu 1,036 a tling tawh a, hri kai avanga tihlum 1,633 a ni tawh bawk. Kuminah hian district 6-ah ASF vawk pulhri hi a leng mek a. ASF hri lenna ni a AH and Vety department-in an puante chu Aizawl, Champhai, Lunglei, Saitual, Khawzawl leh Serchhip district te a ni a. District dang zawng - Siaha, Lawngtlai, Kolasib, Mamit leh Hnahthial te chu vawk pulhri lakah hian an la him rih ni a ngaih a nih thu Vety department hotute chuan an sawi. Hetih lai hian district hrang hrang thuneitute chuan an district chhungah khuahkhirna thupek siamin vawk leh vawkte lakluh leh lakchhuah an khap

bakah ASF vawk pulhri lenna hmunah vawk talha a sa zawrh an khap mek bawk a. Vawksa leh a kaihhnawih lakluh khapna pawhsei zel a ni bawk a ni.

ASF vanga vawk thi zat hi Kum 2021-22 khan 33,417 a ni a, kum 2022-23 khan 12,795 a ni a, kum 2023-24 chhungin 1,214 niin heti hian a vaiin ASF vanga vawk thi zat chu 47,426 a ni tawh a. Vawk suat tawh zat hi Kum 2021-22 khan 12,568, kum 2022-23 khan 11,686, kum 2023-24 chhungin 1,187 niin tihian a vaiin vawk suat zat chu 25,441 a tling tawh a. Vawk thi avanga tanpuina dawng chhungkua 2,488 an awm tawh a. AH& Vety Dept chuan ASF vanga vawk chante tanpuina tur cheng nuai 311, sing 6 leh sang 6 an dil mek bawk a ni.

<><><>

TELECOM

Sawrkar laipui chuan Telecom Service Providr (TOS) te chu rampawn atanga inbumna kaihhnawiha inbiakna zawng zawng lo dang turin a hriattir. Union Ministry of Telecommunications chuan thuchhuah siamin khawvel hmun hrang hrang atanga mi bum chinten Indian mobile number anga mipuite rawn biain, interneta pawikhawihna cybercrime leh sum lama inbumna financial frauds an ti thin a ti a. Heng phone call te hi ramchhung atanga lo intan niloin ramdanga misual awmtan India ramchhunga mobile number anga ti langin an rawn siam thin a ti a. Tunhnaiah hetiang a inbumna hi a hluar a, a lema inmanna feke digital arrest te, Fed Ex sam te, ruihhlo inphurh tir nante, sawrkar mi pawimawh anga inlantir nan leh police official lemahte changin inbumna tam tak a thleng tih an tarlang a ni.

<><><>

PAPUA NEW GEUINEA LANDSLIDE

Papua New Guinea-a leimin avanga thi zat chu mi 670 an tling tawh. Puan tawh angin vanduinah thlenna hmun hi Enga province-a Kaokalam khuaah a ni a. Chenna in 1100 chuang leiminin a chhilh a ni. Mulitaka Province ah pawh thingtlang khaw parukah leimin nasa avang hian harsatna an tawk a ni.

Papua New Guinea hi Australia hmarlama awm a ni a. Hnam chi hrang hrang awmna niin tawng chi 800 chuang hman a ni a. Mihring maktaduai 10 vel an cheng a ni.

<><><>